

DATE: 12/10/2008

Laksana agenda sebelum serah kuasa

Pak Lah dengar pandangan pelbagai pihak, lihat hakikat sebenar sebelum buat keputusan

DARI MUKA 1

"Saya bersyukur kepada Tuhan kerana memudahkan saya membuat keputusan. Saya rasa apa saya lakukan adalah demi kepentingan negara dan parti," katanya yang memakai baju Melayu coklat dan kelihatan tenang di kediaman rasminya di Seri Perdana.

Selepas membuat keputusan itu, katanya: "Akan membolehkan kita memberi tumpuan kepada tugas yang ada" merujuk kepada politik berbilang-bahagian yang berlaku sejak Pilihan Raya Umum 8 Mac lalu dan keperluan menumpukan perhatian bagi memenuhi kehendak aspirasi rakyat.

"Saya mahu menggunakan sepenuhnya bulan-bulan terakhir melaksanakan agenda saya. Menyerahkan kuasa penting, bukan keutamaan saya."

Ditanya apakah yang difikirkannya sebelum membuat keputusan, beliau menjawab: "Saya perlu menyatakan ini. Selepas pilihan raya, terdapat orang yang menyatakan saya mesti mengundurkan diri. Beberapa orang menyatakan saya bertang-

gungjawab terhadap keputusan yang tidak seorang pun (dalam Barisan Nasional) suka, yang mengejutkan anggota parti, terutama Umno.

"Namun ada juga orang lain yang bersungguh-sungguh menyokong dan mahu saya kekal untuk meneruskan tugas. Apabila mereka datang ke rumah saya dalam satu kumpulan yang besar, menyatakan "Datuk Seri tidak boleh mengundurkan diri, Datuk Seri mempunyai misi, Datuk Seri perlu menyelesaikan misi itu".

"Saya mendengar setiap pihak dan pada masa sama melihat hakikat sebenar, memikirkan masa hadapan dan akhirnya saya membuat keputusan muktamad bahawa inilah masanya yang sesuai untuk menyerahkan tanggungjawab saya," katanya.

Ditanya sama ada beliau memaklumkan Yang di-Perutusan Agung mengenai keputusannya tidak mempertahankan jawatan Presiden Umno, Perdana Menteri berkata, beliau tidak memaklumkan kerana ia adalah soal parti.

"Saya masih Perdana Menteri. Apabila tiba masanya untuk menyerahkan atau melantik pengganti kepada Perdana Menteri, hanya ketika itu adalah penting untuk memaklumkan kepada Seri Paduka Baginda," katanya.

Abdullah berkata, kerajaan sudah meletakkan asas yang baik dan berpegang kepada Misi Nasional sebagai panduan negara ini mencapai matlamat Wawasan 2020.

"Saya yakin pengganti saya menyambung kerja saya dan melakukan apa yang perlu untuk membawa kita mencapai matlamat itu," katanya.

Beliau percaya walaupun bukan lagi Perdana Menteri, satu asas yang baik sudah diletakkan untuk pemimpin lain.

"Ya, saya percaya masanya sudah tiba untuk pemimpin generasi baru mengambil alih. Apa yang penting adalah Umno dan BN mestilah bersatu dalam menangani segala cabaran yang dihadapi.

"Saya percaya sikap dan tindak-tanduk anggota parti akan menentukan masa depan parti. Itu paling utama. Jika mereka meletakkan ke-

pentingan parti melebihi kepentingan diri sendiri, Umno akan selamat," katanya.

Ditanya mengenai desakan pihak tertentu supaya beliau mengundurkan diri sekarang dan bukannya pada Mac atau beliau seharusnya diam mulai sekarang hingga waktu beliau menyerahkan kuasa, Abdullah berkata, beliau amat menyedari apa yang mahu dilakukannya.

"Saya sudah merancang persaraan saya, saya sudah merancang terlebih dulu bila saya perlu menyerahkan kuasa dan apa yang perlu dilakukan. Saya terus kekal bukan untuk mendapat nama sebagai Perdana Menteri.

"Saya memutuskan untuk

“Saya mahu menggunakan sepenuhnya bulan-bulan terakhir melaksanakan agenda saya”

**Abdullah
Ahmad Badawi**
Perdana Menteri

kekal kerana saya mempunyai misi. Saya mesti menunaikan janji saya dengan baik terutama untuk melakukan pembaharuan. Ingat, saya dikritik kerana membuat janji yang disukai dan disambut baik oleh rakyat dan mereka kemudiannya menyatakan saya tidak menngotakan janji.

"Tetapi saya tidak dapat menunaikan semuanya dalam tempoh empat tahun pertama kerana saya menumpukan kepada perkara lain. Tetapi ada satu perkara yang perlu saya nyatakan di sini bahawa Manifesto Pilihan Raya 2004 bukanlah hanya untuk empat tahun (yang berakhir hingga 2008) iaitu tempoh semasa saya memegang tampuk pemerintahan dan kemudian saya akan membuat manifesto lain," katanya.

Abdullah berkata, beliau hanya menerajui tampuk pemerintahan selepas tempoh masa pertama pelaksanaan Wawasan 2020 dan beliau masih mempunyai tempoh tiga hingga lima tahun untuk melaksanakan beberapa program.

"Saya memikirkan dalam

tempoh masa kedua di mana saya fikir boleh memilih untuk melaksanakan apa yang saya mahukan dan pada peringkat mana. Tetapi wujud satu perasaan kecewa mengenai apa yang diharapkan rakyat terhadap apa yang perlu dilakukan dan tidak saya lakukan.

"Maka, apabila saya mengumumkan akan mengadakan pembaharuan dalam kehakiman dan Badan Pencegah Rasuah, terdapat satu sokongan amat kuat. Ada orang yang kini mempersoalkan mengapa saya tidak mengumumkan pembaharuan ini sebelum pilihan raya lepas dan mereka pasti akan menyokong tindakan berkenaan.

"Apapun, kini tidak penting lagi kerana apa yang berlaku sudah berlaku. Saya akan memastikan akan melakukan beberapa pembaharuan dan program ekonomi," katanya.

Abdullah berkata, memandangkan beliau masih Perdana Menteri, beliau tidak nampak kenapa beliau perlu diam.

"Mungkin mereka yang meminta supaya saya diam mahu memonopoli tumpuan itu untuk diri sendiri," katanya.